

四庫全書

集部

欽定四庫全書

襄毅文集卷十三

明 韓雍 撰

行狀

先考行實

先考諱貴字公顯世家蘇之長洲人曾祖某祖彥傑父
舉一俱務農業德善重於一鄉母陳氏有懿行先考生
於洪武乙丑十月十日自幼純樸篤實未嘗妄言笑而

尚義重禮不嗜聲利根於天性永樂初以富民徙京師
遂占籍順天府宛平縣卜居於德勝關時京民徭役繁
重先考極力支持備嘗艱苦勤儉治生用成厥家先妣
淑人實相之生不肖孤甫成童即遣就外傳弱冠遣入
京庠為弟子員膏膳供費罔缺嘗誨不肖孤曰吾家祖
宗以來累世業農吾喬居京師經營度時率天性誠實
凡事不解與人較計數為人侮恒產貨利多被奸謀吞
占家計日衰爾宜勤力向學圖進身光顯門戶不肖孤

遵承惟謹然先考性剛方家訓尤嚴不肖孤與弟睦或
學業稍怠必厲言色諄諄戒責較視日課未嘗放怠一
時嘗與鄉人倪文興乘蹇驢客遊居庸至險隘皆捨鞍
徒步見道旁有遺囊文興檢閱內有黃金十兩文興忻
然分半與先考先考曰物上爾手是天賜爾我雖同行
受之不祥堅卻之既歸第文興復分送先考卻之如前
先妣淑人亦贊之曰橫財折福卻之誠宜文興感其義
設酒席來款謝上谷商人侯信嘗以白金來懋遷誤計

秤權納金過於貨直之數而其人已去先考隨覺悟即遣家童追其人回付還之有比隣李姓者先考嘗以白金二百兩附合行商及歸其人悉匿其本利詔以被盜先考實知其欺蔽隱忍不言或勸以訟官先考太息曰我之力不能爭然凡事任天理吾何訟之有既而李氏舉家隨亦疾滅此皆不肖孤所目擊鄉人所共知者正統辛酉不肖孤年甫十九叨領鄉薦明年忝第進士又明年備員內臺先考駸駸喜曰我不圖見爾遽得此科

第顯官也爾須忠勤從事毋忘賤貧時毋黷貨毋濫刑
毋炫勢凌人則能永保爾祿切勿自取羞辱以貽我憂
不肖孤謹識之景泰庚午三月九日蒙朝廷推恩賜勅
命封先考文林郎湖廣道監察御史玉音有積善于躬
之褒及封先妣孺人辛未四月不肖孤蒙恩陞廣東按
察司副使乃迎先考先妣南行先考以炎荒道遠不樂
就養遂還居蘇城之第未幾雍進官都察院右僉都御
史巡撫江西景泰六年九月四日復蒙推恩賜誥加封

先考中憲大夫都察院右僉都御史王音復有惇德樂善延譽鄉邦表俗正家垂休嫺族之褒及加封先妣恭人家居樂田園之趣每清晨幅巾藜杖不之東園之南園課童兒治畦灌蔬閒乘肩輿遊別墅視耕穫秋登既畢招善釀者釀酒多至數百甕酒熟日與親族宴樂兒孫滿前更迭為壽或良友過從必命開尊洗巨觥與之勸酬酒酣藏闔博變以資懽笑盡醉乃已歲春秋鄉飲郡守親致書延請尊以大賓首席拜坐起止恪遵禮度

或鄉人有事註吏議詣先考請託解紛言及財貨者輒
攘袂退避入內不復出達官鉅人鎮臨其地者雖枉顧
頻數每以老辭惟遣子報禮未嘗一入公府用是鄉之
人益重之女夫序班劉俊早世家貧命不肖孤月分京
俸二石濟養其母親族有賤貧者隨宜周卹畧不少吝
天順二年先妣恭人棄養蒙恩特賜葬祭遂併造先考
之壙於蘇城西雅宜山之麓成化元年春不肖孤奉勅
贊理軍務征兩廣叛夷尋奉命提督兩廣軍務兼理巡

撫先考每諄諄示訓戒以毋妄殺邀功兩廣平不肖孤
蒙朝廷錄念微勞進都察院左副都御史未幾先考得
風疾不肖孤以其事聞成化四年四月二十四日蒙恩
旨特賜誥命屬國有大喪未及頒賜不幸先考於是年
十一月初六日終于正寢是歲十二月八日誥始下加
封先考通議大夫都察院左副都御史先妣淑人及追
封先祖考妣如前不肖孤既聞訃痛惟罪大惡極不自
殞滅哀號擗踊五內崩裂無望生全乃援例上疏乞歸

守制荷蒙聖恩矜憐得如例歸復蒙遣進士張澍修造墳塋遣蘇州府知府賈奭諭祭茲卜以成化五年七月十六日合葬於雅宜之塋距生先考享年八十有四子男三人長即不肖次睦以從征兩廣軍功累陞錦衣衛百戶俱先妣出次獻袁氏出女四人長適士人姚信次適鴻臚序班劉俊次適士人蔣珩次在室孫男四人長文以廕補國子生次敏次敷次敞女二人曾孫男二人勛勤女一人嗚呼不肖孤幼稚時庸懦頑劣家且寒微

實賴先考庭訓嚴厲極力供費幸克成立然自入官以來幾三十年多奉使于外恒不得親奉養膝下及病又待罪兩廣上疏乞罷歸未遂不得侍湯藥沒又不得視屬纊終天之痛曷有紀極哉敢收淚撮茲行槩用求當代大手筆為墓誌碑銘以圖不朽云

明故封文林郎河南道監察御史芮公行狀

公諱琦字本初姓芮氏都察院右副都御史釗之父也其先應天溧陽人曾祖以上代有聞人系族蕃衍祖諱

雲卿父諱宏甫世德相承不樂仕進鄉人率稱為長者
母某氏有懿行公生而凝重志如鉅人稍長讀書明道
理慈恕公直見於言動事親事長不違孝謹宗黨咸則
之永樂初以誼誤徙家順天之寶坻辛勤經營作室置
田以為治生計既寧止督遣僮僕盡力農桑以故家日
以豐為善益力嘗市屋通衢既立券其鄰有豪右誣屋
之舊主曾侵其基屋主懦不能明公曰是啓爭端何以
睦鄰即拆屋退所爭之地與豪右而還議定之直於屋

主邑庠文廟供奉器具之屬歲久滋弊公曰崇奉聖賢禮不可苟簡即白于官一力重修費不少各境內橋路歲時亦恒修葺久而益勤鄉之人無所依庇寒且飢者衣之食之死不能葬者先施棺以斂且倡鄰保助而舉之有所假貸者未嘗不與與之亦不汲汲取或久不能償輒焚其券一時好禮尚義之名無或與比人有善必稱揚有過亦必面折不少遜邑大夫知其賢舉以為耆宿敬重有加禮如賓師邑之人有訴訟者悉付公剖理

公折衷剖析無所偏徇咸得其情退悔感服人或逕詣
公訴公亦為之分解訴者或凍餒公嘗濟以米布鄰封
之人有不平亦或訴公且迎公過其境得公一言解紛
無復爭論歲時鄉射之飲迎席上賓視為矩範旁邑遠
近亦莫不聞其賢而慕之至今稱古直人必曰芮公芮
公尤善教子見副都君秀穎異常乃遣入邑庠諄諄誨
之曰汝惟勤學以圖顯揚斯不負吾心副都君佩服進
修克底成立遂舉正統壬戌進士拜河南道監察御史

累陞江西按察副使陝西左布政使進今官公家訓益嚴每寓書戒曰汝幸為重臣必廉必公必勤慎不懈斯不負朝廷不忝爾所生副都君益克體念故所至有守有為卓卓著聲稱公中歲嘗涉溪河直洪水驟至飄沒而東瞬息數里及一沙洲遂得無恙人皆以為陰德所致終以子貴封文林郎河南道監察御史景泰辛未八月十三日卒距其生洪武癸丑二月一日享年七十有九先娶陳氏卒葬溧陽贈孺人後娶陳氏邑之名家子

簡肅貞靜出於天成慈善惠柔不假修習既歸公即從
徙以來相家訓子具有禮則封太孺人享年八十有一
卒於天順己卯十二月三十日其生則洪武己未歲六
月十九日也公有子八人長貴清次鑑次即副都君次
鏜次鑑次鍾次鐸次銅貴清先娶陳所出鑑銅楊氏出
餘皆後娶陳出鏜鐸俱先卒銅以貴受章服餘皆循
循守家業孫男十三人論誠謙餘幼誠為醫學訓科副
都君所出孫女三人皆歸名族公卒之歲副都君在江

西北聞訃還昆仲輩已襄厥事幽堂之石未有刻辭及孺人卒副都君巡撫甘肅朝廷命奔喪歸且遣官諭祭屬有司營葬事乃克啓公之封而祔焉公葬以卒之月十九日孺人祔以卒之明年六月十五日其地在邑之東原副都君將歸過予言曰釗不孝不德先君葬且有年而墓石未刻茲者天復降割先妣棄背且先妣久在床席釗不得侍湯藥既不起又不得視屬纊終天之恨痛何可言然先世德善惟子能深知幸為我述之以圖

永傳雍與副都君生同郡舉進士同年且始仕至今又
同官知公德行之詳誠莫如予故撮其槩為狀以俟名
筆据而採焉謹狀

封徵仕郎工科右給事中王公行狀

公諱肅字肅斌姓王氏始家武進永樂初以閭右之役
遂占籍順天之宛平曾祖諱某祖諱茂林世有隱德父
諱志中養素樂施鄉稱長者母鄒氏有淑行公生而凝
重簡朴容止秀整稍長從鄉先生游沈潛經史大有造

就父母鍾愛之俾圖進取鄉人亦皆目之曰王氏之興
其在茲乎既而有北行不果所圖比至京築室於都城
之陰買田殖貨以為生業家日豐裕公賦性剛直言論
英發為鄉黨所敬重鄉黨之間事有不平必請平於公
得公一言是非曲直帖帖信服不敢復爭論人或庸懦
不能詣公公亦必為維持解紛豪猾強梗俛首從化自
京兆尹縣令以下知公賢時或禮致事多咨詢公有學
術精書法於時事無所不通鄉之後進考德問疑日趨

左右至於應公家之簡牘習鄉社之禮文亦必請質於
公公諄諄諭以理道罔敢違越悉中程度公尚義自奉
雖儉而於義所當為傾囊不惜嘗有恒產在故鄉既不
能自業或勸公售以取直公曰此吾先世之產也何可
售且有猶子謙在售之誠非所宜遂悉歸於謙鄉之人
寒無衣飢無食病無藥死無以為葬者隨宜賑施鄉人
多德之縉紳士夫推公之德量不下古人公嘗誨其長
子讓曰吾家世忠厚汝秀且慧汝宜從師講學以昌大

吾門於是遂遣為京庠弟子員既學成登仕公復勵之
曰爾起諸生官近侍足矣爾宜安分以圖報稱且吾家
素溫飽非藉爾祿為養爾宜守身無玷名爵仕既顯則
恒以知止足勇退休為戒初未嘗及於聲利也公樂澹
素厭華飾晚年以子貴封徵仕郎工科右給事中玉勅
輝煌鄉人羨豔公處之泊如冠袍之榮未嘗輕服出入
未嘗乘車騎惟布衣芒鞋從以僮僕徒步去來見者識
與不識知其為隱君子也性好客且善飲朋遊過從為

具必豐酒酣高談朗吟藏闔擊壺以資笑謔必盡歡乃
已晚雖節飲而樂客之心不倦庸人孺子皆樂於親炙
之也公生於洪武癸亥正月二日卒於天順庚辰閏十
一月十四日享年七十有八卜以辛巳八月十七日葬
於都城西香山之原娶余氏贈孺人先公四十六年卒
繼狄氏封孺人皆出名家懿德克配子男二人長即讓
由正統戊辰進士歷陞工科都給事中進湖廣布政司
左叅政廉靜端方綽有猷為譽望高一世皆公庭訓所

致娶朱氏次琚讀書尚禮通九章之法鄉人禮重娶李氏女一適太學生吳裕子女皆余所出孫男一公壽孫女一尚幼嗚呼雍自垂髫時從大叅硯席有師友之義日得侍公左右辱公教愛極厚膏火之費書劄之資皆取給於公相從有年見公之積德行善著於家化於鄉推重於士夫者皆歷歷在目方期永侍公以承式豈意公遽永畢哉用收淚狀公行實之槩以俟名筆据而採焉謹狀

明故嘉議大夫都察院右副都御史芮公行狀

公諱釗字宗遠姓芮氏其先應天溧陽人曾祖諱宏甫
祖諱仲珖世有隱德父諱琦徙家順天之寶坻好禮尚
義鄉稱善人母陳氏有賢行公自幼天性警穎父母口
授以書即成誦稍長遣游邑庠讀書績文大有造詣遂
以書經領正統戊午京闈鄉薦明年會試禮部中乙榜
例當授校官公不屑就卒業太學壬戌登劉儼榜進士
觀政都察院維時憲綱新進初任不得授御史而掌臺

事者亦剛嚴少許可然見公在諸進士中姿宇魁梧風裁凜凜不能不屬意迺登諸進士試刑書月再試公每列上第掌臺事者深器重已而朝廷以御史清要之官不可以他途雜進亦注意進士臺憲因入奏考選進士二十有四人為御史兩京公在首選為河南道授承事郎河南道分隸皆劇司且司考覈京師郎署以下及畿內百職事未幾公掌道事刑政清肅考察明允他道缺御史守篆者亦付公兼理一時聲名藉藉動朝野甲子

奉命按治遼東既歸復按河南所至風稜峻整憲紀修飭鋤強擊貪不少寬假將吏士民畏之如神明貪墨吏有望風解印綬去者已而復按治江西江西地大民衆詞訟填委素稱難治公至布條章謹約束抑強扶弱令行禁止於是境內大治吏民畏威而懷德嘖嘖稱頌以爲前此所未有既代歸人皆眷戀不忍捨景泰庚午公受勅命進階文林郎及封其尊公爲文林郎河南道監察御史母陳爲孺人未幾朝廷知江西之人思公不能

置遂拜公江西按察副使時壬戌進士百五十人未有
登金紫者金紫自公始士君子莫不嘆羨公至部凡所
激揚繩糾有加於前聲稱益大振卒未以外艱去位江
西十三郡之人羣訴于按部使欲公奪情以圖終惠按
部使以聞值禁例不果遂得終制甲戌陝西右布政使
闕員天官以關中地重民夥且供餉三邊承旬之官非
素有才望者不克稱迺薦公於朝往蒞厥官公夙夜孜
孜焉區畫撫綏邊儲充足民庶安止一時論天下賢方

伯必以公為稱首明年進左布政使德政益修人無間
言天順丁丑今上復大位慎選臺憲且以整飭邊備非
臺臣不可遂召公入朝拜嘉議大夫都察院右副都御
史食從二品祿授以璽書命巡撫甘肅公至鎮感上知
遇勞心焦思知無不為勤練習謹斥堠精器械廣儲蓄
分兵禦要害而復籌兵民利害而罷行之灼將吏勇怯
言於朝而進退之武備大修百度咸貞邊人愛戴而畏
服雖古名方鎮莫或過之庚辰丁陳孺人憂朝廷重邊

計命公奔喪歸且遣官賜葬祭裏事畢還鎮辛巳虜酋
李來悉衆寇涼州公提兵突入涼州嚴守備與虜相持
時出奇兵戰虜或踐蹂虜營斬獲甚衆虜驚懼不敢近
復分其部落寇莊浪甘肅諸處道路梗塞人情憂疑公
隨機應變分兵勦襲所向克捷虜輒遁走凡虜出沒諸
處幾一載而城守無虞兵威不挫虜卒氣索奔北致數
千里之境廓然清寧論者以公運謀鼓勇經略指示之
功居多朝廷方行報功之典而公不起矣壬午九月三

日也中貴總戎歸其裝惟衣冠簿書而無纖介私物衆
莫不服公之操守不可得計聞上為悼惜其子壻往迎
喪特給驛以行既至復遣官賜祭及營葬事公生於永
樂享年五十有奇娶許氏邑之名家女懿德克配封孺
人子男幾長誠為醫學訓科次某女幾人國子監生張
瑄其壻也孫男幾孫女幾公葬在卒之明年某月某日
其地在邑之東原嗚呼雍與公生同郡舉進士同年觀
政都臺同道拜御史同日後奉使于外數同處茲復同

進位都臺且心同道同知公行誼之詳誠莫予若也然以公之才之德天下士大夫如雍之相知者方期公握臺章登卿輔以大厥施而公竟止於斯豈非命哉用抆淚錄公行實之槩為狀以伺名筆据而採焉謹狀

墓表

楊母孺人樊氏墓表

景泰七年九月予延常山醫師楊文深治疾文深因奉南京刑部侍郎舒城鄭公所叙其母孺人樊氏行實再

拜請予表其墓孺人諱某常山疊石人家世顯大父庭
鋪母某氏俱有善行孺人自幼端淑聰慧女紅之事不
勞師氏而嫻甚為父母所鍾愛及笄擇配歸里之處士
楊仲振事姑孝御下慈處妯娌和其相處士克謹克順
惟義之歸處士善針砭四方之人有疾更數醫莫治者
多輿舟就處士醫殆無虛日孺人為主中饋酒漿之給
不怠不厭人益賢處士蓋得其助其教子嚴而有法故
諸子克世其業益振家聲不忝先德其懿德淑行範於

閨閨者尚多也孺人生於永樂某年某月某日歿於成化某年某月某日享年五十九嗚呼惟婦女德善不出閨門一時人罕能知必觀其夫子而後可知其賢考處士與其諸子之為人則孺人可謂婦道母道之兼盡者矣故表之以勵世云

明故蔣雪巖墓表

錫山蔣愷宗源初與予識於備倭翁都督所翁稱其為人及予所見其言動知其為世家名士也遂相與交遊

有年今年春予奔先妣喪襄事畢將之京愷因奉其先
君子雪巖君行狀踵門泣拜求予表其墓及抵京復走
書固請嗚呼予生也晚不獲見雪巖然觀愷可以知其
父矣誼不能辭迺按狀而為之君諱頊字敬夫姓蔣氏
雪巖其別號也初為汝南人徙居錫山之胡塘曾大父
諱彥文大父諱伯鎮父諱輝世有隱德鄉稱為長者前
母顧氏母時氏咸有淑行君儀表明秀襟度灑落讀書
造理孝友忠厚之德聞於鄉邦早喪父兄顯雖筑然了

立而維持家業日益豐裕事必從義行姪恂方五齡君
愛誨如己子長為之冠娶如禮姪女四撫養均厚及笄
一贅許季新餘皆擇良配以歸奩具豐盛寡姊惟一女
君為納壻夏孟章與之產第俾終養妹適陸氏者卒且
其家舉族戍邊君出白金百兩抱甥歸義嫁於士族甥
張緒失怙延師教之其下有不率者執於仇家君密捐
數十金歸之終弗許僕有行竊者公覺之驚曰毋怖貧
故耳遺以囊粟使去終身不以語人其義之行於家族

姻黨若此君童子師吳芸碧艱於衣食公恒周給之暨
沒為之治具以葬越人桑公制蘇人湯以平皆托交於
君桑貧不能歸君為置囊具僕從湯無子君歲致所需
預資其葬費詩人謝孔昭善繪事自京歸老假館於君
君愛其詩為之繡梓以傳其義之行於師友故舊若此
平居在鄉濟寒濟飢行之久而不厭嘗過鄰邑聞有豪
右取民私負笞撻苦甚君惻然罄所有代之輸俾釋其
繫縛亦不問其姓名後數歲道遇羅拜君訝之迺泣道

所以且曰君厚德無以報願天錫君壽福耳景泰之末
歲荒歉有司勸貸於君君曰吾分內事奚勸為輒傾廩
於官事聞朝廷榮以冠服其義之行於濟人利物又若
此也君性明達善評藻論古今事成敗辯作者體制皆
出人意表而樂於恬退日與文人韻士相羊山水間以
詩酒琴奕自適視聲利泊如也景泰甲戌十二月二十
八日以疾卒於正寢距其生洪武己卯三月十四日得
年五十六以天順元年四月初三日祔葬於膠山先塋

之次配郭氏宋道鄉文忠公後子男一人即愷僮樂
義綽有父風女二人張如良夏怡其壻孫男一人堂鳴
呼義美名也世之人固皆慕義而能實踐者恒鮮比年
大江之南富家巨室輸粟濟荒而被榮恩者多矣義冠
博帶華其服飾高大其門廬問之則曰褒義也而名浮
於實豺虎其鄉者或不能無如雪巖者平生義以行事
由親以及疏自內以達外卓卓可稱道若此誠無忝命
服之榮足以垂世範俗而愷拳拳焉圖惟發幽潛以昭

永久可謂孝矣是皆有關於世教可書也予故表之使觀者知所警云

友蘭嚴先生墓表


嗚呼自正統戊辰秋予出按江西便道過鄉識友蘭先生於鄉人陸起敬之第先生不予鄙累以詩贈予亦酬答情好甚篤于今未二十年先生已作古人嗚呼傷哉先生諱澤字濟民姓嚴氏蘇之長洲人生警穎莊重言動不凡稍長從鄉先生馮伯平游探究羣書造詣深邃

然性尚雅淡不屑意仕進一惟留心於詩凡漢晉唐諸
大家之作皆熟讀而諷詠超然有得每朋遊過從山水
遊行覩物興懷有所感動一發於詩口占臆決援筆立
就雖若不經意而冲澹典則駸駸乎晉唐風雅士林迄
今猶多傳誦鄉人慕其賢爭延聘教授家塾陸起敬晚
致之重加敬禮宗族子弟悉以付焉先生開導訓誨先
之以孝弟忠信而詞章為次諄諄懃懃久益不倦以故
諸生多底成立若今工部主事張君汝振亦陸氏之甥

先生之高弟也先生平日家居孝於親友於弟信於朋
友不逐時世所好而獨愛乎蘭嘗植蘭數本於庭花時
呼酒對酌徘徊終日若契友然因以為號晚年究心於
易於吉凶消長進退存亡之道心領而神會凡有疑惑
為之標註音釋以便後學纂紹運圖一帙并著詩文若
干卷藏於家先生生於洪武庚辰三月四日卒於天順
壬午七月十三日享年六十有三卒之日戒二子毋禮
佛飯僧而教之以和順教之以積學曾大父天福大父

友直父仲珍皆弗耀母邵氏配吳氏子男二曰朴曰樗
皆以文學教授於鄉朴尤善星命能為詩緯有父風女
三人周英王旻張容其壻也孫男三人庸倫理孫女三
未行卜以明年某月某日葬於彭華鄉許溪之原嗚呼
自古有道之士薄富貴利達而不為吟詠嘯歌於山澤
之間而教化行於鄉黨州閭之內揆之時中之道雖未
盡得而廉貪敦薄有功於世教亦君子之所深取故嘗
稱之曰逸民若先生者豈非逸民之儔而亦有功於世

教歟凡人之為人有功於世教者史氏之所必錄予故
為表之以備採擇且以勵世云



襄毅文集卷十三

欽定四庫全書

集部

襄毅文集卷十

五四

詳校官庶吉士臣陳若霖

中書臣劉源溥覆勘

總校官檢討臣何思鈞

校對官待詔臣胡士震

謄錄監生臣楊簡中

欽定四庫全書

襄毅文集卷十四

墓誌銘

故陸母孺人吾氏墓誌銘

明 韓雍 撰

景泰乙亥閏六月己巳蘇之大澤陸母孺人吾氏以疾
終于家距其生洪武壬子八月癸丑享年八十有四卜
以明年丙子九月庚午祔于華麓山其夫之封其孤珩

乃奉前安吉縣丞王敏道所狀行實詣余銘其墓余與
陸有通家之好知孺人行誼為詳用述而銘之孺人諱
貞字淑貞姓吾氏其先長洲高塾之金園村人曾祖某
祖懋卿世有隱德父仲剛克承克振一鄉稱為長者母
金氏有懿行生五女孺人居季幼孤莊肅重靜寡言笑
子職女紅不勞師氏而嫻甚為母氏及諸父所鍾愛及
笄擇配得同邑陸守道以歸陸出晉大司馬抗之後富
甲於鄉為文獻故家稱首孺人既歸之奉烝嘗豐潔誠

敬不違禮度事姑朝夕孝謹承順顏色相夫克順克勤
惟義之歸其它處妯娌訓子女御臧獲無不一盡其道
陸氏宗族上下相慶得賢婦永樂甲午守道以才賢應
徵辟家事付孺人孺人飭其子事必稟命以行皆秩秩
有序子益知好禮辛丑守道辭歸其隱晦之德高尚之
節得孺人內助居多既沒孺人哀毀逾禮母錢以壽終
無嗣孺人哭之慟命二子鉅費舉其喪至其二女兄死
亦如之歲時之祭皆不廢景泰甲戌鄉郡大荒民飢死

者相枕藉孺人命珩出粟以賑之適朝廷遣大臣至錄其義珩得冠帶榮身服以拜孺人孺人喜而諭珩曰冠帶朝廷貴重之器豈輕授人乎所以重汝之之為義也汝必佩服謹不忘補報珩之義聲益振亦孺人家教之力也子男二人長即珩次瑄早卒女一人適士人張樞孫男五人瀚濤濟溥泳孫女六人皆適顯族曾孫男六人曾孫女一人惟婦女德善不出閨門一時人罕能知必觀其所親而後可知其為人若孺人者相夫成其德

全其節教子篤於禮榮於義而已嫁已老孝愛不衰於
父母昆弟可謂人道之兼盡者矣世豈易得哉乃為之
銘曰

子之職婦之道母之儀備于躬化于家表于時壽而上
終而正藏而宜昭其潛銘其幽永其垂

故徐行中妻莊氏孺人墓誌銘

莊氏孺人既沒之明年予自京還鎮江西便道過鄉其
子璣捧其友中山湯衡所狀行實泣血再拜請予銘其

墓予念與璣久要自景泰辛未秋獲拜孺人於其堂而今不作矣銘其敢辭哉按狀孺人諱正圓姓莊氏世家蘇之長洲曾祖某祖某父惟賢俱有隱德一鄉稱為長者母周氏有淑行孺人生而聰慧柔順德充於容行踐於言女紅無不精師氏授以女孝經女箴女誡諸書輒能成誦通大義父母甚鍾愛及笄擇配歸同邑宦族徐行中氏內外稱其善無間言事姑孝奉養恭慎得其懽心姑終哭之慟治喪如禮四時祭奠籩豆簋簠之實率

親營具必豐潔迺獻相夫謹行中才行有司迫為萬石長賦集而民不擾賢聲震耀而孺人綜理家政家庭之間秩秩有序内外言不相出入行中沒孺人哀毀幾絕脫簪珥去膏飾戒肥鮮終其身如初時教子嚴二子璿璣讀書勵行卓然成立嗣長區賦事必請命以行於先德有光人知其所自孺人性好施人有急雖疎且遠必周恤恐後而處族黨待嫺戚字臧獲無一不盡其道宗里之人視以為楷式晚年璿既喪璣孝養益謹朝夕

左右甘旨之奉極其敬厚孺人靜處一室焚香端坐日誦金仙書自怡既得疾諭子婦曰吾將不起矣爾曹當思前人創家之難為善以保身家則吾雖死無憾遂卒景泰甲戌九月三十也距其生至正丙午五月十七日享年八十有九子男二人即璿璣女三人程矩鄒璘王晉其壻也皆士族孫男五人黼謨黻組綬孫女三人曾孫男女各二人卜以卒之明年某月日葬于邑之彭華鄉高景山之原從夫兆也嗚呼惟婦女德善不出閨門

一時人罕能知然觀其內外之稱與其夫子之賢若孺人者可謂婦道母道之兼全矣世豈易得哉是宜有銘
銘曰

於維孺人長者之裔歸于有家斯德允配為婦為母道
全厥躬登茲遐年式表鉅宗得正而終心罔愧負華合
于良迺安迺固我撮其休勒諸幽堂嗣續振振永大以
昌

故郭以藏墓誌銘

天順丁丑九月二十五日長洲郭君以藏以疾卒於家
距其生永樂己亥正月二十七日得年三十有九卜以
明年九月二十五日葬於邑之車坊里先塋之次其孤
琮乃奉趙同魯所狀行實哭載拜求予為墓銘嗚呼予交
以藏久且厚方資為良友聞其疾心甚憂之然意其為
人必速愈以永年而以藏竟不起矣予忍銘其墓哉按
狀君郭姓諱士賢以藏其字也世為蘇之望族曾大父
彥珍勞勤起家隱德弗耀大父伯衍父叔明家日以裕

積而能施鄉人以長者稱母吾氏有懿行君為人和粹
端重讀書領大義孝友義讓之行出於天性少事叔明
府君府君性剛毅遇諸子少假辭色君能日左右執子
道罔敢怠忽卒得其懽心府君沒哀毀逾度葬祭必以
禮事母吾氏甘旨之養厚而能誠內外無間言事兄用
行極恭順家庭之務公私之應惟兄言是聽而口體之
奉必厚於兄薄於己舉冠婚必豐於諸姪儉於己之子
未嘗有私蓄既長賦於鄉催科出納一守條制貿易假

貸惟平以寬不屑屑瘠民以自肥鄉之人貧病婚喪弗能自舉者周卹扶助行之益久不倦景泰甲戌歲大饑朝廷遣使往賑因勸民輸粟以補官有司上其名君曰家事任長吾何與焉即贊其兄使就列得拜冠帶之榮而君退然守布素如平時嘗題其藏修之所曰順菴因以自號後遊南京大司成吳先生以下多為詩文以讚之抵家及疾作鄉人聞之無賤貴戚疎咸以其私謁神以禱至道路相望既不得會哭者不約而集君屬纊之

夕方寸不亂命琮等曰吾疾無可為若能相世父以成家勤問學以立身則吾瞑目矣言訖而逝配張氏助德宏多子男二長即琮次瑄女一在室孫男一嗚呼古有所謂善人君子者以藏其人也而今不可得矣是宜有銘銘曰

維善之全胡嗇之年而名則傳

故左母孺人曾氏墓誌銘

南城左賢舉進士之明年其母曾孺人以疾終於家又

明年三月計聞京師賢將歸治喪迺哀經奉國子博士
房齡所狀行實泣拜以請于予曰痛惟先母病不肖不
得侍湯藥既不起又不得視屬纊茲幸得歸以襄厥事
不肖辱與執事少同門且同里巷先母德善惟執事知
之詳願賜銘以刻諸幽辭不獲乃按狀而叙之曰孺人
諱玉真姓曾氏世家建昌之南豐父應魁有隱德一鄉
稱為長者母李氏淑行克配生孺人幼而柔淑不事華
飾不苟言笑恂恂閨門未嘗及門外事父授之女孝經

列女傳諸書輒成誦通大義子職女紅不勞師氏而嫻
甚為父母所鍾愛稍長擇配得南城左君世瑤遂以歸
之既歸事姑嫜克誠克勤甘旨之奉晨夕弗敢懈慈惠
和緩宜於一門上下莫不慶悅永樂初朝廷選富民集
京師世瑤在列而其行在次所親或疑之孺人謂世瑤
曰庶人召之役則往役義也況家事承緒在長斯役之
往惟宜遂相之以行既至京占籍順天之宛平公家之
務助而應之不勞以濟而樂於施貸丙辰秋忽大雨寒

其所居之外有餓夫困斃道在孺人聞之惻然謂世瑤曰此迫於飢寒耳盍拯之即圍之以熟薪灌之湯以飲既蘇復暖之以衣遣人扶歸其家賑貧卹孤率多類此撫育諸子內訓孔嚴贊世瑤咸擇師以成之而次子賢尤警敏遂遣補京庠弟子員授麟經於今天官少宰姚公之門資用所需咸給以備正統某年適世瑤卒於京孺人拯哀毀率諸子歸葬於其鄉不違禮則賢既除服以來孺人諄諄以立身揚名為期待賢克體遂以景泰

丙子領京闈鄉薦舉天順丁丑進士觀政刑曹方期迎
養以迓推封之恩而孺人不逮矣嗚呼惜哉孺人生洪
武庚午二月十五日終於天順戊寅十二月十日享年
六十有九葬于子之原男四人長贊次贊次即賢女一
適某孫男十二某某孫女五某某惟婦女德善不出閨
門人不可得而知然觀其夫之賢與其子之成立則亦
可知而況予交其子鄰其居知之有素哉是宜有銘銘
曰

內助之力內訓之飭夫賢而子成立是維孺人之德

故朝請大夫雲南布政司右叅議趙君墓誌銘

天順己卯三月十四日雲南布政司右叅議趙君行恕以疾卒於鄉其孤汴具其外兄全以和所狀行以价走書京師屬予曰先君不幸奄忽棄背而襄事有日不肖孤稚且貧不能得當道操史筆者為文以銘況先君德善惟先生知之詳願矜而銘之嗚呼予與行恕同鄉且同為御史有年甚相好也豈忍遽銘其墓哉然而知行

恕者誠莫如予若固以弗忍辭則無以文諸幽而行恕
有遺憾矣乃叙而銘之曰君諱忠姓趙氏行恕其字也
其先宋宗室福王與芮六代孫繇汴徙越再徙蘇遂為
蘇之長洲人高祖諱孟桂元中奉大夫檢校大司農平
原郡公曾祖諱由璫濰州知州祖諱宜濬隱德弗仕父
諱學禮樂善好施鄉稱長者卒以子貴贈文林郎河南
道監察御史母陳氏懿德克配封太孺人行恕自幼秀
穎端重異於常兒稍長氣岸魁梧楚楚如老成人父遂

遣入邑庠為弟子員從鮑堯夫司訓授禮經問學講習
窮晝夜不少間學成遂以宣德己酉領京闈鄉薦庚戌
登進士第觀政內臺踰年擢河南道監察御史文林郎
明法律達憲體慨然有澄清天下之志而哀矜愼恤恒
存於其心時鄉先輩陳僖敏公掌臺事振厲風紀御史
中非卓卓者雖鄉舊不少假辭色而獨禮重行恕正統
己未奉命按四川所至鉏強擊貪問民疾苦而興革之
境內清肅未幾有司報松寨商巴棘麻國皆叛君即奮

勇率兵入其巢震以風威諭以禍福其黨衆悉潰既而廉得其實乃統兵者激變所致遂封章劾其罪罪之朝廷遣使賜寶鈔酒幣將吏攝服番民向化邊境以寧辛酉奉勅巡浙江海道早夜盡心撫士卒飭兵備繕城堡嚴斥堠卒無意外之虞壬戌歲朝廷簡能御史清理天下軍政廷臣僉議舉行恕乃拜璽書之廣東督勵所司期以實效雖蠻鄉瘴海無不躬造周履其地不踰年軍士就清解者甚多民不告擾一時為御史者皆自以為

莫及未幾朝廷以陝右鉅藩嚴方岳之選遂擢行恕右
叅議行恕居官勸吏治恤民隱陝之人無老稚賢不肖
皆愛戴敬服尋以舊官復任改雲南左叅政因構疾還
鄉調治遂不起距其生永樂甲申享年五十有六卜以
卒之明年某月某日葬吳城西齊鴈嶺配莫氏先卒生
一女贅故家子盛炳繼娶蘇州衛千戶朱某女生一男
即汴補郡庠生行恕平生操履端謹財出非義者一介
不苟取故久歷仕途囊無餘貲還鄉鄉之居室族子弟

以窶而售之人矣行恕攜家累孑然無所於歸其友
朱名仲憫焉乃假餘屋以居之既卒其喪不能舉名仲
復偕其友徐文輝輩倡助以襄厥事蓋朱徐皆義士也
行恕為人和易與人交欸欸露誠素公暇賓僚過從必
具酒樂客諷詠詩歌繼以壺矢盡懽乃已客有延行恕
者行恕亦必盡其懽不屑屑較彼此也為文章典重和
厚詞理精到詩好唐人每風晨月夕撫景感懷必見諸
賦咏長篇短章清新典雅足追古作顧其才德表表然

若此士君子方以遠大期之而行恕位止藩叅年未下
壽而終豈非脩短窮達固繫之於定命哉然高科顯仕
幾三十年有聲稱而無愧怍吾知行恕亦瞑目矣是宜
有銘銘曰

才之充而位弗崇德之良而壽弗昌是固有命長存雖
不幸而何傷俯仰無慚終始得正垂休流聞嗣續有慶
故朝列大夫廣西左叅議朱公墓誌銘

公諱驥字漢房姓朱氏世為琴川文學里人祖以上隱

德弗仕父仕進樂善好施鄉稱長者母蔣有淑行公自
幼警穎絕人八九歲能涉獵經史十三為詩屬文有老
成句弱冠父命為邑庠生孜孜力學不懈寒暑於三百
篇溫柔敦厚之旨研究益精學官命題較文援筆立就
詞理明暢優於同會士友正統戊午遂以是經領京闈
鄉薦將角藝春闈值外艱家居哀毀骨立後三年壬戌
始克登劉儼榜進士百五十人公風儀秀雅文思煥發
題詠述作迴出人右而揮毫染翰遒勁美麗自成一家

朝士甚器重之未幾上命典遼府喪事惟勤惟謹克稱
任使王深嘉之癸亥擢大行人奉使所至宣上德達下
情不愧任使而與人辯論古今人物得失事成敗利鈍
劍鋒差差傾座斂聽議者謂其誠有專對之才既而叙
賢勞進監察御史正色立朝侃侃論事不為權貴所屈
嘗出按淮南諸處風稜峻整民吏震懾剖決訟獄筆無
停思所至人皆以才御史稱之閱三載受勅贈其考文
林郎浙江道監察御史母妻俱封孺人時廣西盜寇竊

發民不堪命藩臬諸司官皆簡才望卓卓者往任當道
遂薦公為廣西按察司僉事階奉議大夫公至籌畫可
以弭盜事宜若干條獻策於主帥安遠侯柳公安遠雅
信重惟其言是聽以行多所克捷盜既平安遠以公多
奇功聞於朝陞公廣西布政司左叅議進階朝列大夫
已而盜復起公從安遠出伐籌畫益多渠魁就擒餘盜
悉平朝廷知其由遣中使齎璽書金帛即軍前諭勞甚
至公之平生所樹立章章若此凡其僚屬與朝之縉紳

士大夫率以卿輔期之而公以公事入京便道過鄉遽疾遂不起嗚呼傷哉公生於永樂丁酉九月十有三日卒於天順壬午正月十有六日享年四十有六娶唐氏金華通判唐先生之女端淑清惠克配其賢子男一汝霖女三適繆權李猷王某皆名族卜以甲申年某月之某日附葬於址虞山先塋之旁葬之先其孤汝霖詣予求墓銘嗚呼予與公為同年交逾二十年而在臺憲時為同寅心相契語相合意相敬慕觀公之為人宜其遠

大不止如縉紳士大夫之所期望而公遽止於斯豈非
命哉予亦豈忍銘公之墓哉然唐公予嘗受業而公有
同年之誼皆不可辭遂為之銘銘曰

人之期公將謂大顯於時公之自期將欲大展厥施何
天之生才於世而俾之遽止於斯此造物之使然非人
力之能移公知命而達理雖不幸而奚悲有闕其藏有
崇其封慶衍嗣人奕世亢宗

太淑人葛氏墓誌銘

成化壬辰四月十四日直隸蘇州衛指揮使謝瑛之母
太淑人葛氏以疾卒于家瑛求鄉人廣東布政司叅政
劉君昌狀太淑人行實遣人齎書來廣以墓碑銘為請
瑛予壻也自予以弱息歸所望太淑人教誨以進德而
今棄背矣銘其可辭哉按狀太淑人諱善清姓葛氏世
為直隸大名府清豐縣人曾大父某以武勇從太祖高
皇帝開國累功拜指揮使大父有女洪武初選入宮二
十六年冊為麗妃生伊王既而從王之國父能久當受

蔭太宗文皇帝入繼大統以戚里之恩授孝陵衛指揮
使遂家金陵母蔣氏生子九人男六女三太淑人其仲
也時太淑人之兄覃襲指揮使次某為楚王府儀賓覃
次子某又為寧王府儀賓長女冊授新昌王妃一時葛
氏之盛華貴相望世無與京而太淑人克循姆氏之教
幽靜端肅女紅之事不習而能年及笄父母擇配歸謝
氏為昭勇將軍直隸蘇州衛指揮使欽之妻後軍都督
府都督僉事芳之家婦入其門事上御下動有儀法時

昭勇公之母太夫人在堂治家極嚴整遇諸子婦未嘗輕語笑有過差輒叱戒之太淑人朝夕造床下問飲食備極恭謹得其懽心太夫人嘗語所親曰吾婦出戚里華族能極盡婦道吾子真得內助矣昭勇公治職百務修舉上官極禮重而親賢好士根於天性吳中名公鉅儒無不與之游門庭車馬殆無虛日太淑人主中饋規使左右治具延欸禮無遺闕既生瑛甫能行即教以禮度稍長俾就外傳程訓益嚴用是瑛克屏紈綺之習即

若老成人至未幾昭勇公以勞績受誥封太淑人居十
七載而昭勇公遽危疾且久太淑人日夕執湯藥不敢
託諸妾媵甚勞瘁人或憐之太淑人曰盡吾終事心不
知其勞也昭勇公疾既篤顧太淑人曰太夫人在堂諸
孤女不皆汝出所以為養為撫字者在汝太淑人泣受
命而昭勇公卒時瑛尚幼瑛兄瑄稍長而非太淑人生
太夫人謂太淑人曰祖宗之蔭襲當在瑛而瑄長長而
官則人憚而事舉今易以瑄代襲俟瑛成立而正之何

如太淑人唯唯及太夫人卒太淑人哀毀舉喪葬不違禮數年瑛日益長讀書有成孝友之行爲士林慕羨且公議嗒嗒言當歸以所假官太淑人乃以其情上疏于朝備極勞費凡三載事始白而瑛得官官五載而太淑人得進膺今命又若干年卒距其生永樂庚寅十二月十一日春秋六十有三生子三人男二長瑛次表補長洲縣學生以文章試異等廩于官女一適海寧衛指揮使徐恭又有子九人男三瑛珙璘女六皆出少房孫十

人男五勲贊勇瑛之子鳳瑛之子凰璘之子也女五太
淑人撫之皆有恩諸子所娶婦多貴族婦翁亦多尊顯
若兵部侍郎李公與致仕黎宋兩方伯則尤著著太淑
人一教以太夫人持家之道秩如也諸女多嫁為萬戶
侯妻太淑人亦多厚為奩資不吝至於妾媵必懷以慈
惠安以寬洽而賓客之費報施之需與內外之所仰給
者太淑人亦必自為料理而與之節約寧豐而無儉於
是人稱太淑人有丈夫志太淑人卒時語瑛及表曰吾

事太夫人終天年事昭勇公有子子瑛已正嫡庶之分
表復嗜學駸駸乎有成吾復何憾然表尚未得仕瑛宜
策勵之母俾在人後吾子勉哉言訖而卒瑛及表與諸
子號慟治喪葬悉遵禮制而儀文之詳哀戚之誠視世
俗有間茲卜以某年月日奉太淑人之柩葬吳縣大茅
山之原從昭勇公兆也嗚呼婦女德善不出閨門惟觀
其夫與子之為人可知而世家大族閭政尤難治今觀
昭勇公之賢瑛之克肖及其宗族子姓循禮而不肆太

淑人之德善人固已知况予為姻家知之尤詳哉是宜
書書而系之辭曰

婉婉淑人出于戚里懿德夙成弗驕弗侈既歸宦族孝
于尊章克相夫君益謹烝嘗家業愈豐生祥既翕撫教
成立嫡也襲蔭克肖克成仲氏業儒學博才宏孝養並
隆壽福咸備溘然逝矣孰不揮淚母儀婦道兼盡有餘
女範新編史官應書大茅山原風氣攸止合藏于茲永
庇孫子

襄毅文集卷十四

欽定四庫全書

襄毅文集卷十五

明 韓雍 撰

祭文

祭太子太保兼都察院左都御史陳公文

嗚呼公之生也六十有八年天之景星其光氣也世之
鳴鳳其聲威也山之華嶽其高大也水之震澤其宏深
也春陽秋霜其仁且嚴也霽月寒水其明且清也而今

不可作矣嗚呼哀哉憶在文皇公方進取大對明廷褒
然高舉妙齡佳文海內推許公於斯時宗元韓愈拜官
侍御風采昂藏正色立朝秉節巡方繆糾愆繩濁激清
揚公於斯時張綱范滂出佐臬司湖湘遂安擢貳都臺
大綱斷果執法敢言不搜細瑣公於斯時子方獻可分
鎮關中三邊戒嚴西賊驚遁奸宄深潛干戈偃息將吏
熙恬公於斯時稚圭仲淹時和歲豐民蠹殄滅化洽人
心謳歌大悅報以生祠留之卧轍公於斯時周公召伯

歸總憲府表率百僚進位師臣無怠無驕五極咸中致
君唐堯公於斯時伊尹臯陶名遂功成勤勞致疾既知
止足亦明去就抗章辭歸衣錦行晝公於斯時疏廣疏
受思公復起終濟蒼生遽聞永畢當宁震驚既錫寵莫
又營佳城矧予感恩能不傷情嗚呼生之有死猶晝之
有夜必生無所忝死得其正斯為始終惟公一生盛德
膾炙人口無可憾矣五朝元勲流芳史冊足報稱矣官
至一品禮進義退出處正矣壽幾七旬易簀而斃考終

命矣賢子賢孫克振家聲有餘慶矣千秋萬歲正人君子蓋棺事已定矣東望灑淚寄奠一觴神其鑒予敬矣
嗚呼哀哉尚饗

祭亡妹夫鴻臚序班劉尹文

嗚呼劉君遽止於此即歲在辛未予補外臺汝追送我潞河徘徊予來西江又餘二載每得汝書如接風采今春得報將往金陵省汝季父掃汝先塋且云事竣訪我故里我親懽慰倚門望汝我亦自擬恐得還京與汝同

去綢繆親情孰料汝命遽此永畢得弟書報使我驚泣
嗚呼痛哉是果然耶抑夢也耶汝之平生為善積德溫
溫謙恭抑抑謹飭習書累歲始獲一遷供事內廷亦未
三年凡百交游無不愛慕當道君子亦垂青顧我知汝
志勸汝進修望汝遠大以光親儔我望未副汝志未達
始逾三旬云胡天札嗚呼痛哉汝之門戶孤苦零丁父
子薄宦家無豐盈汝父已沒汝母將老汝妻尚弱汝女
又小汝既乏嗣又無仲昆汝死不顧棄此一門幼孤無

依老弱無倚切我肝腸涕淚如雨嗚呼痛哉雖然死生
常理脩短定數汝之一生無愧無負幸汝易簣得安故
丘汝魂正直想無怨尤但汝孤魂不知何處山川迢遙
能否歸去我痛雖切會哭未能先遣妻弟奠汝一罌地
久天長永難再見汝有靈爽鑒我心念嗚呼痛哉尚饗

祭故大司空雙崖周公即巡撫周文襄公

嗚呼文章政事世人患不能兼公能兼之禮進義退世
人患不能全公能全之惟公之生螺山之秀通敏明誠

宏博忠厚其為學也經史淹貫詞章純善早為名儒以之而取功名甲科高選繼為吉士以之而司制作預修大典讀其文若長江大河誦其詩如佩玉冠冕宣金石而被絃歌嗣風雅而繼墳典人推其振治世之音鳴國家之盛蓋方之退之子厚而無忝其為政也小試刑曹克體帝仁五極咸中獄無冤民既相親藩曰慎曰勤遂荷寵遇進階重臣惟東南財賦之淵藪公受命經略以巡撫效賢勞而驅馳善區畫而咨詢民生仰之以蘇而

四海之得所國用賴之以充而萬世之相因是其擴忠厚之德妙經濟之才方之定國劉晏而為倫其始而進也以禮自重久歷資階方登侍從八座之榮千鍾之奉矧中流之砥柱巨明堂之梁棟初則廷臣交薦而受知終則帝心倚注而簡用固非若李愿所譏伺候於公卿之門奔走於形勢之途肯逐羣而隨衆焉其終而退也執義允堅年幾古稀辭疾歸田上方俯徇其情公遂拂衣以旋登山而翫水採美而釣鮮足以振頽風而扶世

教足以儀後學而追前賢誠有如疏廣所述知足不辱
知止不殆甘勇退而自全焉嗚呼人之所不能者公皆
能之矣然自公之退休東南之民既多凋弊軍國之需
亦勞經理君子憂國而憂民望公康復而再起云胡大
限永畢于此里巷為之走哭縉紳為之哀毀諒當寧之
始聞亦震悼而拊髀矧予辱知最深其情曷能自己嗚
呼公不可得矣百行罔虧五福咸臻不愧于天不忤于
人紀之汗青勒之貞珉盛大光榮千古不湮聊奠一觴

寫此慎真幽明感通庶幾有神嗚呼哀哉尚饗

祭蕭母太淑人周氏文

嗚呼古有伯鸞讀書養高生業不憂妻能服勞又有不
疑平反大獄嚴而不殘母嘗教勗懿懿淑人擇配世家
貞靜莊肅慈惠柔嘉表于宗門化于邑里婦道母儀古
人並美允矣君子學成鉅儒一領鄉薦遂歸隱居授徒
以經養親以孝克遂厥心有相之道偉哉冢嗣成名顯
揚歷職廷平進總臺綱天子倚畀百僚承式克善厥官

皆教之力尋沐推封屢拜龍章紫綬赫赫朱翟煌煌祿
養既豐尊榮斯備宜享遐壽云胡奄棄嗚呼凡厥有生
孰能不死死而無聞比比皆是惟淑人兮有福有壽有
子有孫得正而終被服隆恩既錫祀禮又錫宅兆太史
刻銘公卿走弔榮名令德千古芳馨淑靈有知含笑以
寧其令子同官聞訃驚悼匍匐一奠申詞以告嗚呼哀
哉尚饗

祭李都御史太夫人柯氏文

嗚呼夫人百行兼修五福咸臻其祀先也敬以時其養
姑也孝以勤其以道相夫也夫為鄉邦之高士其以義
教子也子為社稷之名臣其撫下睦族恩禮諄諄其慈
仁肅雍曷嘗有一行之不純其封秩也登二品其享年
也踰七旬其受命服也炫珠冠霞被之榮其就祿養也
享烹龍魚鳳之珍其桂子蘭孫嗣續振振其伉儷偕老
曷嘗有一福之或屯其得考終恩禮殊深其賜祭也出
大官之佳品其賜葬也卜吉兆之高墳其歸靈輒也百

僚走奠而執紼其發潛德也太史述傳而為文誠所謂
生榮而死哀雖死而猶存雍與令子登第同年列官同
寅奉使于茲聞訃悲辛匍匐境上跪奠一尊神其有知
鑒此微忱嗚呼哀哉尚饗

祈晴告城隍文

邇者陽德愆候淫雨連旬田苗多傷屋廬久湮民生弗
堪愁苦悲辛維茲民命主司在神神宜顯靈以昭至仁
誅扶蠱蜮劃翦雲陰以拭后土以廓高旻化灾為豐庥

此下人神或難專請祈天闕咎若有歸雍等自任幸勿
遷怒濫罰吾民神能響應不負時禋投誠告神庶其鑒
臨謹告

祭楊司寇尊甫先生文

嗚呼自古道修於已而能淑諸人者垂千載之賢聲德
修於已而未足其位者享累世之恩榮蓋修道德則流
芳而衍慶斯亦天理之自然而適有見於先生偉哉先
生光岳之精得麟經之奧旨掇高科而蜚聲擢任儒官

斯道大行恩義盡而無計利之心教法嚴而有講解之
明歷星子邵武而終於新安其門人高科顯仕者皆先
生啓發而成至今被化之人慕其道皆立祠祭奠而不
更誠有如胡安定之在蘇湖千載之下流史冊之光榮
平生積德而秉義極忠厚而和平甘自老於冷官不徇
苟而蠅營人雖惜先生位未稱德而先生未嘗與命之
相爭天心憐而錫眉吉夢叶乎長庚家學能傳步武登
瀛伯也著將相之勲業官極品於兩京仲也歷中外之

憲臺能知止而戒盈龍章推恩於先生加贈春官之上
卿况垂蔭乎賢孫濟濟然襲武弁而取科名誠有如王
景叔之植三槐累世之後繼閥閱之簪纓嗚呼惟有道
德者百世尊之而不惑况予後生晚進辱令子知愛而
匪輕偶來官於先生之鄉望率木而含不盡之情西湖
之原山高水清神安以安百世不驚跪奠一觴鑒此微
誠尚饗

祭大江之神文

比者雍肅奉簡命同監軍總戎統率大兵往征南夷分
兵五運汧流西上旬日已抵安慶雍等部下舟楫帆檣
雖間有損偏裨將士咸無灾害感神庇佑實銘於心惟
是遊擊前鋒偶觸風濤人船有損是其部下事神弗虔
神特降殃然今聖天子新即大位為百神之主禮神祀
典惟崇惟敬而命將出師除暴安民實惟望神之庇佑
伏望神慈少息降灾之怒普施濟物之仁陰相默佑俾
颶風不作洪濤永息後先舟楫咸濟安流釋將士驚險

之虞解朝廷南顧之憂且祈助我天兵振揚威武所向
克捷速奏凱還則神之陰德上下俱感而神之威靈益
暴白於天下後世祀典益崇而不替矣故茲謹告尚饗

祭勅封小孤山天妃聖母文

雍等肅將明命往征叛蠻分兵五運沂流西上茲已賴
神之庇咸過孤山前途孔脩江湖闊險伏望神慈陰相
默佑俾風恬浪靜舟安人安實惟荷神之休謹用祭告
尚饗

祭洞庭湖水府之神文

惟茲洞庭海內巨浸惟神司之必靈必信雍等奉命南
征道經茲郡敬禱于神望神之蔭怒濤不作風波恬順
是惟神休感激無任尚饗

祭直隸鎮江衛指揮童漢文

爾率師從征勞勤弗憚方圖進爾共除多難何天之生
爾才賢咨爾壽算良醫滿前莫起爾患然死於王事視
死於兒女之手蓋有榮而無憾特給舟以歸爾之旅櫬

兼致奠以表我之悼嘆尚饗

祭衡山之神文

自古名山大川為海內之嶽瀆其神必靈而應驗亦甚
速維茲衡山秀萃坤軸火德鍾靈寔奠南服赤帝館於
其巔祝融宅於其麓雲氣興而雨澤降下土潤而萬物
育陰德元功誰敢不肅雍等奉辭伐罪值此炎燠道出
臨蒸次師信宿紫蓋芙蓉羣峰在目欲趨謁而弗能徒
瞻仰而俯伏特遣官以致奠仍申之以青祝恭望明神

介以景福普陰相而默佑俾將士之戩穀潛消瘴癘安
行水陸助貔虎之英勇速犬羊之敗衄務期一鼓而全
勝立見兩廣之平服是神休無遠而弗屆將祀典益光
而永篤謹用祭告靈應可卜尚饗

告天地神祇文

比者南蠻梗化搖毒遐荒兩廣生靈若墜塗炭天子新
即寶位憫念惟深特命雍等統率大兵往正其罪茲已
次于敵疆將圖水陸並進而靈雨彌旬山水泛濫舟楫

驚懼行營未安憂心皇皇弗寧寢食用是敬陳素悃仰
叩玄穹伏望大德洪慈陰相默佑早賜雲開雨散風和
日晴陸進舟行士馬安便所至兵鋒奮厲威武振揚速
成克捷之功以副朝廷弔民伐罪之意雍等不勝感荷
天休之至謹告

祭旗纛之神文

維茲兩廣叛蠻久違王化戕害民命罪惡貫盈聖天子
甫即大位奉天勤民憫茲廣人久墜塗炭特命雍等統

率大兵來茲伐叛用救民生初指桂林賊侵我疆五發
偏師所向克捷是皆神威助我先聲今寒霜既降肅殺
維時蕃漢夷兵川匯雲集雍等整飭兵戎申嚴號令將
圖分道並進往問叛蠻之罪惟神主司戎兵三軍瞻仰
伏望威靈陰相默佑指麾將士旌旗所向戰勝攻取指
日削平羣兇慰安黎庶使地方永永無虞用副朝廷伐
罪弔民之意實荷靈神無疆之休謹用祭告尚饗

祭風雲雷雨廣西境內山川社稷城隍文

自古神之為德正大光明福善禍淫至公無私雖遲速不同而報應未嘗爽也今兩廣蠻賊背逆天道虐害生民十有餘年之間常出為患且流毒於湖廣江西地方殺戮民之丁壯奴辱民之妻女掠其財貨焚其屋廬蓋不可以數計又或破寨屠城官僚被害殘忍慘刻罪惡貫盈獲罪於天天心震怒聖天子初即天位體天之心行天之罰特命雍等統率大軍來問其罪茲已臨賊境分道並進敬告于神伏望神明各行其職各顯其靈指

示導引陰相默佑務使我軍威聲震赫籌算允中所向
戰勝攻取蠻賊神魂喪亂脫走無門所至就擒就戮地
方一鼓而削平萬姓回蘇而安紫庶幾仰答天心稱朝
廷伐罪弔民之意而靈神享有常祀益有光而無愧矣
故茲懇告尚饗

祭江湖淮海之神文

雍等奉辭南來伐叛是圖兵鋒所臨拉朽摧枯甫逾半
載民賴以蘇天心固仁神力豈無當涸而漲遏賊奔途

雖驚無虞保我征夫神之威靈固已感孚今茲凱還遠涉江湖恭望靈神默相陰扶利我將士安我舳艫弗阻弗驚遠達帝都益感神休終始不渝謹用祭告尚饗

祭大江之神文

雍等奉命提兵留鎮疆域羣盜雖平民志未一用飭兵戎綏順討逆我軍旣載沂流西出默相陰佑望神司職蹈險無虞所向無敵盡復太平彰我神力謹用祭告尚饗

祭旗纛之神文

雍奉命提兵留鎮南蠻狂寇雖平餘孽猶滋寒霜既降
肅殺維時仰體天心爰整我師汴流西行祈神指麾務
殲殘兇俾無漏遺庶康我民彰神靈慈謹用祭告尚饗
祭后土之神文

向以行臺狹隘屋廬淺少因出在官餘貲市地易材命
工增修兼創運籌之亭茲已畢工重念半載之間百工
交雜築掘剝削罔知避忌豈無冒犯神威用是謹竭愚

誠特伸告謝伏望明神鑒此微誠宥其冒犯且陰相默佑使行臺之內火盜無警居人咸安不勝感荷神休謹告

祭南海之神文

惟神主司大海明靈正直陰佑下人濟此南國王師來臨討滅叛賊所向功成惟神之力雨暘允時百穀蕃殖黎民不飢惟神之德幸茲泰和感神無極報謝有禮曷敢差忒致奠且祈申我悃悃豐登年年殘孽盡息益彰

神休永光廟食尚饗

祭前保傅尚書大學士芳洲陳先生文

於乎自古大臣君子得時行道功名始終者固多而以忠義文章見忌於時橫遭遠謫者亦或有焉此寇忠愍所以有雷陽之貶而蘇文忠所以有昌化之遷是豈人力之能為而實時命之使然偉哉先生百世之賢歷事五朝踰四十年其心術光明而正大其學術純博而淵淵其臨大事決大議非宗社之計不謀于衆其侍經筵

資顧問非堯舜之道不陳于前其代絲綸走筆而萬言
立就其銘金石吐詞而四海永傳遭列聖寵遇而登瀛
洲之選兼公孤卿相而贊化機之權值時危疑為人所
忌因肆欺蔽羅織成愆謫遐方而守困累陳情而籲天
賴日月之明誅奸諛於既死雪冤誣之謗賜黃冠以歸
田享高壽幾八旬得易簣而歸全嗚呼自古成敗利鈍
未可以論人物而清議既定始見其賢與不賢然寇蘇
之賢流離遷徙不遂首丘而清議由士夫定於既死之

後先生之賢一斥即復考終于家而清議出聖明定於
未死之先想先生無愧于心必含笑而入九泉生出自
門牆感德懸懸圖報未能涕泣恒漣作鎮南荒以憂北
還雖衰經不宜理人事而恩義不可以或偏爰遣人跪
奠於墓道庶表我心之拳拳尚饗

祭崔冢宰母文

嗚呼夫人生於慶門早歸君子克相克諧德善並美乃
生賢器庭訓有方秉時奮庸為國家良爰司邦憲爰掌

邦治百僚敬承天子倚注祿養既厚褒封屢加珠翟金
衣二品光華忽報仙遊朝野殞涕天子驚悼厚錫葬祭
隆恩盛福今古罕同合葬佳城哀榮始終辱厚令子誼
均哀戚緘詞致奠清淚沾臆尚饗

先考通議府君發引告祭文

嗚呼我父遽棄我耶我父壯年徙居北都生我諸孤撫
養艱苦遺雍從學家業已隆膏火束脩供費益勞幸克
成人薄有祿養我母先逝父心孔傷祿既稍豐我父已

哀我又奉使久缺定省豈意哀疾終焉不起諸孤痛傷
如割我心嗚呼我父平生積德行善致衍慶澤蔭及不
肖罔極深恩如天廣大雖蒙朝廷三錫誥勅推封我父
已為大官聞計上疏又錫葬祭但我諸孤永言懷恩再
不能奉一日之養叩地呼天哀痛曷勝茲以七月十六
日敬引我父靈輿至蘇城西雅宜山與我母淑人合葬
敬用牲醴之奠拜辭几筵地久天長此痛無窮我父幸
安慰長往勿懼勿驚嗚呼哀哉尚饗

祭錦衣馮指揮孟仁乃翁

惟德忠厚之德施于一鄉孝友之行聞於四方慶衍後
昆篤生賢嗣以儒起家荐登近侍兼資文武一秉忠誠
推本慶源帝錫恩榮金帶緋袍翱翔錦里五福兼全世
罕能比年幾八袞忽爾仙遊恩典有加賁于林丘雍託
交賢嗣義均哀戚寄奠陳辭有淚沾臆尚饗

祭前保傅尚書大學士芳洲陳先生文

嗚呼士感知已之德雖子孫繼世尚傳示而圖報況一

死一生能忘情而不痛悼即當正統之季年值邊寇之
孔熾毒已流於西江勢若難於平治雍奉命以巡方幸
因人而成事然素不諂乎權門自分必終於播棄得代
還朝擢副外臺莅政未幾恩詔復來撫巡重臨乎舊地
華資猥及乎菲才初猶未知其所自後知辱舉於公台
固感朝廷取人於論薦豈忘先生物色於塵埃况當斯
時犬馬之年甫三旬外臺之擢纔八月無老成之宿望
無久任之功伐非回天之重力曷越資而驟發然使雍

嘗有利以干先生而先生薦之是私謁得薦感固不如
此之真有言以求先生而先生薦之是諂諛得薦感亦
不如此之深惟先生薦賢為國一至公而無私惟雍無
意得薦故刻骨而銘心有鬼神之照察與天地之鑒臨
嗚呼先生歷相五朝始終一節晚遭世變根連禍結賴
先帝之聖明復衣冠於大耋詎意都亭之話別乃先生
之永訣哉雍違教有年仕路間關久作鎮於南陲曾以
憂而北還雖遣官以祭奠心未安而厚顏茲者叨進秩

以再臨受專征之倚眷推厥本原肇於初薦用修禮於
玄堂敬再拜而一奠感德無窮不勝悲戀尚饗

祭丘學士母太孺人李氏文

嗚呼孺人寶婺之精瓊山之秀作範閨門肅雍慈厚早
歸君子克相克承蓄德弗施鄉人並稱中道孀居撫孤
守志晚節不移璽書旌異偉哉令子忠孝夙成慈訓亦
嚴魁選成名玉署高登經筵慎選啓沃聖心贊襄國典
惟帝嘉念褒封及親命服煌煌祿養方殷忽報仙遊朝

野隕涕帝心惻然特頒諭祭榮名盛福遐壽全歸卜葬
牛眠海天光輝雍等開府粵南聞訃傷悼遣奠一觴緘
詞以告尚饗

祭鎮守浙江太監盧公文

惟靈歷侍累朝聖心簡在兩鎮浙江兵民咸戴方期永
年庇此一方忽報仙遊朝野共傷某等昔同奉命來征
兩廣因以成功心恒感仰倏焉永隔悲慟弗寧遣奠一
觴少慰英靈尚饗

祭陳都御史母夫人闕氏文

嗚呼夫人。生於慶門。早歸君子。克相克諧。德善並美。乃
生賢器。庭訓有方。乘時奮庸。爲國忠良。爰總風紀。爰承
寵命。督漕撫民。功名鼎盛。祿養既厚。褒封屢加。珠翟金
衣。暮景光華。忽報仙遊。朝野隕涕。恩典有加。遣官致祭。
榮名盛福。今古罕同。合葬佳城。哀榮始終。雍等辱交令
子誼。均哀戚。緘詞致奠。清淚沾臆。尚饗。

祭故少保戶部尚書兼華蓋殿大學士芳洲陳先

生文

嗚呼古有蘇公因譖按邊忠感時君未死內遷又有萊
公被讒遠謫忠聞後主死猶加澤猗歟先生百世偉人
文章典謨事業經綸忠直難容橫遭計逐英廟聖明旋
歸初服繼雖長逝清議未安主上明聖悉還舊官一忠
遭誣存沒表白况錫葬祭重恩輝赫墓碑初刻國史易
書久屈大伸萬古美譽雍出自門牆感德無已緘詞遣
奠神其鑒止尚饗


祭鎮守廣東市舶奉御杜公文

惟公歷事累朝勤勞謹飭晚監市舶恪恭乃職繼因衰邁謝事居閒正爾優游忽出人寰雍等相處有年聞訃驚悼遣奠一觴申詞以告尚饗

祭謝母太淑人葛氏文

惟靈生於華族歸於慶門奉姑以孝御下以仁克相夫君儉勤恭敬王畿大衛允修兵政方當顯盛忽失所天撫字遺孤勞辛有年孤既有成襲官如舊配我弱息同

養慈壽何其一疾倏忽云亡訃音南來舉室悲傷爰遣
兒曹恭修薄祭淑靈有知歆此微意嗚呼哀哉尚饗



襄毅文集卷十五